



PASUKAN PETUGAS KHAS IMUNISASI COVID-19
COVID-19 IMMUNISATION TASK FORCE (CITF)

**PENJELASAN MENGENAI KESESAKAN DI PUSAT PEMBERIAN VAKSIN
DI LEMBAH KLANG**

Pasukan Petugas Khas Imunisasi COVID-19 (CITF) ingin memaklumkan bahawa beberapa tindakan telah diambil untuk memastikan kedatangan serentak penerima vaksin yang majoritinya daripada bukan warganegara dalam kumpulan besar di Pusat Pemberian Vaksin (PPV) yang telah menimbulkan kesesakan dan pelanggaran SOP tidak lagi timbul.

Kesesakan yang dilaporkan di media semalam terjadi apabila sebilangan besar daripada penerima vaksin ini telah hadir tidak mengikut waktu janji temu yang diberikan. Ramai yang hadir di waktu pagi, walhal janji temu adalah di waktu petang.

Selain itu, kegagalan pekerja asing dalam mengisi borang dan memuat turun aplikasi MySejahtera menyebabkan proses tersebut mengambil masa yang lama. Setiap pekerja asing memerlukan lebih lima minit untuk mengisi borang dan menyebabkan kesesakan di kaunter pendaftaran. Terdapat juga jurubahasa yang membantu, tetapi proses tersebut masih memakan masa.

Mengambil kira keperluan untuk tindakan segera diambil agar kesesakan yang menyumbang kepada pelanggaran SOP di waktu wabak COVID-19 menular dapat dielakkan, CITF telah mengambil beberapa langkah segera untuk mengatasi masalah ini.

Antaranya, CITF telah bekerjasama dengan pihak Polis Diraja Malaysia untuk menyekat perjalanan sebarang kenderaan seperti bas dari luar Lembah Klang yang membawa sama ada pekerja asing atau rakyat Malaysia secara beramai-ramai untuk mendapatkan suntikan vaksin di Lembah Klang.

Selain itu, CITF juga telah meminda tarikh janji temu bagi sesetengah penerima vaksin untuk mengurangkan jumlah kehadiran agar kesesakan daripada masalah komunikasi yang telah diterangkan tadi dapat dielakkan.

Hasil daripada tindakan CITF ini, kesesakan di PPV yang terlibat terutamanya di waktu petang, telah dapat dikurangkan hari ini.

CITF juga sedang mempertimbangkan keperluan untuk mengkhususkan beberapa PPV untuk warga asing mengikut bahasa yang digunakan agar sumber-sumber yang diperlukan, seperti penterjemah atau sukarelawan dapat ditempatkan agar proses vaksinasi dapat dipermudahkan.

CITF akan terus memantau perkara ini dan mengambil tindakan bersesuaian dari semasa ke semasa.

– TAMAT –

Dikeluarkan pada: 29 Julai 2021